

# Koos du Plessis

Daar is sekere Afrikaanse liedjies wat amper volksbesit is en wat Ma, Pa en die hele gesin ken. Dink hier aan liedjies soos “Kinders van die wind” en “Somerkersfees”. Die man wat hierdie **lirieke** geskryf het, was **Koos du Plessis** (1945-1984).

Koos du Plessis staan ook as Koos Doep bekend en was ’n sanger, liedjieskrywer en digter wat ’n groot bydrae tot die Afrikaanse musiektoneel gelewer het. Daar word van hom gesê dat hy ’n “**fenomenale** impak” op die ontwikkeling van Afrikaanse musiek gehad het en hy is selfs met internasionale sterre, soos Bob Dylan, Leonard Cohen en Jacques Brel, vergelyk. <sup>1</sup>

Daar word ook gesê dat hy meer as enigiemand anders gedoen het om ’n **revolusie** in Afrikaanse musiek teweeg te bring. <sup>2</sup>



## Lewe en loopbaan

Koos Doep is op 10 Mei 1945 as Jacobus Johannes du Plessis op Rustenburg gebore. Sy pa se naam was ook Jacobus Johannes du Plessis en hy was ’n boer. Sy ma se naam was Hester Johanna Buitendag. Du Plessis was een van vier kinders, hy het ’n ouer suster, Hester, ’n ouer broer, Boet, en ’n jonger broer Henning gehad.

Sy ouers het ná teenspoed hul plaas verloor en die gesin moes **noodgedwonge** stad toe verhuis. Hulle het na Springs aan die Oos-Rand getrek waar du Plessis by die Laerskool Pam Brink en Hoër Seunskool Hugenate skoolgegaan het.

Hy het ná skool ’n onderwysdiploma aan die Normaal Kollege Pretoria voltooi en daarna ’n BA-graad met spesialisering in [Afrikaans](#) aan die Universiteit van Pretoria behaal.



Vroeë foto van Normaal Kollege, Pretoria

Koos het sy loopbaan as **joernalis** by die destydse koerant, *Die Vaderland*, afgeskop. Hy het tussen 1966 en sy dood in 1984 by vier koerante van die destydse Afrikaanse Pers en toe Perskor gewerk, naamlik *Die Vaderland*, *Oggenblad*, *Die Transvaler* en *Die Nataller*.



Laataand in die nagkantoor as Koos sy kitaar uitgehaal het

Hy het in 1964 vir Mornay du Plessis ontmoet en hulle is in 1969 getroud. Mornay het later vertel dat dit sy humorsin en stoute streek was, wat haar as jong student na hom toe aangetrek het. Hy het graag poetse gebak en grappies gemaak. <sup>3</sup>

Koos en Mornay het in Amanzimtoti gaan woon, waar hy verskeie poste by *Die Nataller* beklee het. Mornay was 'n onderwyseres en het daar skoolgehou. Hulle het later besluit om na [Johannesburg](#) terug te keer en hy het weer by *Die Vaderland* gaan werk.



Mornay du Plessis

Die paartjie het drie dogters, Irma, Karla en Karien, gehad en Du Plessis het vir sy vrou en dogters liedjies geskryf. Sy tweede album, *As almal ver is*, bevat liedjies, soos "Miskien Karien", "Karla" en "Irma".

Hy het ook deelyds 'n **honneursgraad** in Afrikaans-Nederlands aan die Universiteit van die Witwatersrand voltooi.

Koos het later by die *Oggenblad* in Pretoria gaan werk en hy en sy gesin het in Wierdapark in Centurion, [Pretoria](#), gaan bly. In 1983 het hy by *Die Transvaler* begin werk. <sup>1</sup>



## Musiek

Koos was van kleins af lief vir musiek en wou in standerd 8 (graad 10) sanglesse neem, maar 'n sangjuffrou het glo gesê hy het nie die nodige vaardighede nie!

Hy het as student sy eie liedjies geskryf en geleer hoe om kitaar te speel. Platemaatskappye het egter deur die jare sy musiek afgeskiet en wou sy liedjies verander, maar Du Plessis het geweier.

Een van sy vriende het op 'n dag 'n **kassetopname** van sy liedjies na 'n sanger en hoof van 'n platemaatskappy geneem. (In daardie tyd was daar nie iets soos digitale musiek nie en musiek was nog op plate en kassette beskikbaar.) <sup>2</sup>

Die bestuurder van die platemaatskappy Incline House se naam was Nick Taylor en hy was dadelik mal oor Du Plessis se musiek. Du Plessis se musiekloopbaan het 'n **hupstoot gekry** met die geleentheid om drie liedjies op die TV-program *Perspektief* te sing. Hy het ook in die program *Musiek & Liriek* opgetree en 'n paar konserte by Die Laager by die Markteater in Johannesburg gehou.

Die bekende **regisseur** Katinka Heyns het sy liedjie "Kinders van die wind" ontdek en besluit om dit as **temaliedjie** vir haar TV-reeks *Phoenix en Kie* te gebruik. Die sangeres Laurika Rauch het die liedjies in die TV-reeks gesing, onder meer "Kinders van die wind", "Sprokie vir 'n stadskind", "Die somer is verby" en "Skielik is jy vry". Rauch het "Kinders van die wind" as 'n **solussewe** uitgereik en dit het gou gewild geword. Dit was so in aanvraag dat dit binne die eerste week van bekendstelling twee keer herdruk is. Rauch en Du Plessis het **goue plate** vir verkope van meer as 25 000 kopieë ontvang. Dit het 13 weke lank op die **treffersparade** gebly.



Van links: Laurika Rauch, Katinka Heyns, Koos du Plessis, Chris Barnard, Nick Taylor en Fran Marks van Stanayn Records tydens die oorhandiging van die goue plaat vir *Skadu's teen die muur*, Koos se eerste langspeelplaat, in 1979

Du Plessis het in 1980 sy eerste **album** as sanger opgeneem. Die naam van die album was *Skadu's teen die muur* en dis vir verskeie toekennings benoem, soos vir die Afrikaanse Langspeler van die Jaar. Sy liedjie "Kinders van die wind" is ook vir Liedjie van die Jaar benoem en het uiteindelik die toekenning as beste Liedjie van die Jaar by die Springbokradio-Sarie-toekennings gewen.

Sy tweede album, *As almal ver is*, het twee jaar later verskyn. Sy derde album, *Herbergier*, het in 1981 gevolg en is vir Afrikaanse Langspeler van die Jaar tydens die Springbokradio-Sarie-toekennings benoem. Daar het ook in 1981

twee **bundels** van Koos se lirieke verskyn. Du Plessis het op 9 Augustus 1983 'n **oorkonde** van die Afrikaanse Taal- en Kultuurvereniging (ATKV) ontvang vir sy bydrae tot die bevordering van Afrikaans. In 1985 het 'n versameling van sy gedigte *Om jou verlaas te groet*, saamgestel deur Fanie Olivier, verskyn. Daar het ook tien jaar later 'n tweede versameling gedigte met die titel *Skink nog 'n uur in my glas - nagelate verse* gevolg.

Koos du Plessis het op 15 Januarie 1984 verongeluk. Hy was op pad na sy vriend en musiekregisseur, Nick Taylor, wat besig was om sy vierde album, *Die vierde horison*, op te neem. Hy het in sy Volkswagen Kewer na Taylor gery, maar was in 'n motorongeluk in Knoppieslaagte, naby Centurion. Hy het 38-jarige ouderdom gesterf. Die album is in 1995 onvoltooid uitgereik. <sup>1</sup>

## Woordbank

<b>album</b>	'n Versameling liedjies.
<b>bundels</b>	'n Versameling van verhale of gedigte, in die geval lirieke (woorde van liedjies).
<b>dokumentêre rolprent</b>	'n Rolprent wat gaan oor mense/onderwerpe en <b>feitelik</b> aangebied word.
<b>feitelik</b>	Werklike storie word vertaal. Dit bestaan dus uit feite.
<b>fenomenale</b>	Merkwaardig/buitengewoon goed.
<b>goue plate</b>	Goue plate is uitgereik op grond van verkope van albums. Die getal van verkope het deur die jare gewissel, maar in daardie stadium het Du Plessis meer as 25 000 albums verkoop.
<b>honneursgraad</b>	Dis 'n akademiese graad wat 'n mens ná 'n baccalaureusgraad kan doen.
<b>huldeblyk</b>	'n Eerbetoon.
<b>hupstoot gekry</b>	Ekstra krag, aanmoedig, aanspoor.
<b>joernalis</b>	Iemand wat artikels skryf.
<b>kassetopname</b>	Musiek wat op 'n kasset geplaas is en waarna mense kan luister. Kassette was klein, plat plastiekkissies met 'n magnetiese band waarop klank opgeneem is.

<b>kollig</b>	Wanneer iemand baie aandag kry as hy of sy bekend is, soos sangers of akteurs.
<b>lirieke</b>	'n Liedjie se woorde.
<b>noodgedwonge</b>	Gedwing word om iets te doen.
<b>oorkonde</b>	'n Eerbewys.
<b>regisseur</b>	Iemand wat akteurs afrig.
<b>revolusie</b>	'n Omwenteling.
<b>solussewe</b>	'n Grammofoonplaat met 4 minute speelyd aan elke kant.
<b>temaliedjie</b>	'n Lied wat gespeel word as 'n fliek/program begin (en eindig).
<b>treffersparade</b>	'n Lys van die gewildste liedjies (meeste verkoop) op 'n spesifieke tydstip.

## Lees die volgende artikels om meer oor Koos du Plessis te leer

- [Meer inligting](#)
- [Wie was Koos Doep?](#)
- [Koos Doep](#)

## Kyk na hierdie video's oor Koos Doep

**Luister na sy bekende "Kinders van die wind"**

**Luister na Du Plessis se "Gebed"**

**Kom saam na 'n liedjieaand by Margaretastraat 28 met Koos Doep en ander**

**Koos Doep**